

Rapport annual 2011/12

Giubileum 50 onns Sedrun Pendicularas SA

En sia introducziun menziunescha il president André il giubileum da 50 onns Sedrun Pendicularas SA. Cun in per patratgs seregorda el dalla historia, da sia partenza malguessa igl onn 1962, co tut ei sesviluppau e la gronda midada succedida suenter 50 onns. La historia d'ina interpresa da success per la val che ha promoviu il turissem d'unviern s'auda al vargau. En special fa el era menziun dil cudisch ch'ei cumparius pil giubileum

Museum La Truaisch – exposiziun Nossa scola

En collaboraziun cul Museum La Truaisch ei l'exposiziun sur dalla scola vegnida preparada e presentada alla fin digl onn 2011 en fuorma d'ina vernissascha. L'exposiziun ha dau ina investa el svilup dalla scola cun presentar ils bauns da scola d'antruras, ils requisits d'ir e luvrar en scola, ils cudischs ed auter bia. Ina numerusa retscha da films e fotos han cumpletau l'exposiziun. L'exposiziun ha svegliau interess sur las scheinas dalla vischnaunca ora. Ina lavur davart la historia dalla scola ha accumpignau l'exposiziun Nossa Scola.

Mummetta – Prelecziun ord il cudisch da Dumeni Capeder

Dumeni Capeder ha ragischs tuatschinas davart da sia mumma ch'ei carschida si a Bugnei tiels Curschellas. Ella prelecziun el Hotel Krüzli ha el presentau sia ovra davart sia mumma – titulada cun Mummetta. Igl ei stau nundetg interessant d'udir il scribent e la biografia d'ina mumma ch'ha giu in tut special e fascinont decuors dalla veta.

Casti da Putnengia

La gronda lavur dil FcT ei per uonn seconcentrada sil casti da Putnengia. Cun agid d'ina uniun indigena ei il plaz da lavur vegnius preparaus e silsuenter ha la firma Loretz sanau ils mirs dalla tuor e quels dil contuorn. Oravontut ein las miraglias viers vest vegnidadas sanadas da rudien e reconstruidas agl original. Cun agid da signur Nöthiger, in um specialisau sil sector da castials, ei quei reussiu stupent ed il casti fa ussa ina pareta d'ina certa luschezia e noblezia e muossa empau la dimensiun da pli baul.

Las preparativas per la tuor interna ord lenn schaian ussa oravontut ellas ponderaziuns davart la finanziaziun. Plinavon vegn cun primavera eregiu ina punt per arrivar sul foss el casti. Igl access al casti pretenda ina senda e clars muossavias. Quel duei succeder neu da Dieni e Rueras.

Tablas informativas

Avon maun stat in exempel per il Plaz Cadruvi. Ei stat ussa sin via da metter en vigur tallas tablas d'informaziun e mirar il resun. Quella acziun dependa tonpli era dalla finanziaziun, dil sustegn davart la vischnaunca ed uniun turistica.

Giu

La lavur vid il tetg ei empau s'entardada. La lenna ei denton pinada e las slondas vegnan semtgadas el decuors digl unviern. Aschia vegn la lavur executada el decuors digl onn 2013.

Skizzas a Rueras

Las skizzas silla casa da Giusep Monn ein enconuschentas. La tradiziun raquenta da skizzas fatgas en connex cun l'invasiun dils Franzos igl onn 1799. Nus vein fatg attents la tgira da monuments sin quellas skizzas ed igl interess da quellas varts ei semusaus a moda positiva. El decuors digl onn 2013 vegnan quellas inventarisadas e dessignadas! Silsuenter suonda ina interpretaziun dalla valeta historica dils dessegn mural.

Calender 2013

Il calender 2013 ei embellius cun fotos dalla collecziun Foto Gross da Sogn Gagl. Las fotos dateschan dils onn 1960. Ils davos onns stuein nus deplorablamein constatar ina digren dalla vendita. Quei dat a nus da patertgar tgei intervegnir, ni forsa in summa desister d'in calender cun fotos tuatschinas.

Il president: André Schmid